

Skriflesing: Openbaring 3:7-13Teks: **Openbaring 3:8**Sing- **Ps. 68:9; Ps. 138:1,4; Ps. 89:1,7; Ps. 73:1,11****Openbaring 3:7-13**

Rev 3:7 En skryf aan die engel van die gemeente in Filadelfia: Dít sê die Heilige, die Waaragtige, wat die sleutel van Dawid het, wat oopmaak en niemand sluit nie, en Hy sluit en niemand maak oop nie:

Rev 3:8 Ek ken jou werke. Kyk, Ek het voor jou 'n geopende deur gegee, en niemand kan dit sluit nie, want **ky het min krag en jy het my woord bewaar en my Naam nie verloën nie.**

Rev 3:9 Kyk, Ek gee jou uit die sinagoge van die Satan, van die wat sê dat hulle Jode is en dit nie is nie, maar lieg Ek sal maak dat hulle kom en voor jou voete neerbuig en erken dat Ek jou liefgehad het.

Rev 3:10 Omdat jy die woord van my lydsaamheid bewaar het, sal Ek jou ook bewaar in die uur van beproewing wat oor die hele wêreld kom om die bewoners van die aarde op die proef te stel.

Rev 3:11 Kyk, Ek kom gou! Hou vas wat jy het, sodat niemand jou kroon kan neem nie.

Rev 3:12 Wie oorwin, Ek sal hom 'n pilaar in die tempel van my God maak, en hy sal daar nooit weer uitgaan nie; en Ek sal op hom die Naam van my God skrywe en die naam van die stad van my God, van die nuwe Jerusalem, wat uit die hemel van my God neerdaal, en my nuwe Naam.

Rev 3:13 Wie 'n oor het, laat hom hoor wat die Gees aan die gemeentes sê.

Skriflesing: Openbaring 3:7-13Teks: **Openbaring 3:8**Sing- **Ps. 68:9; Ps. 138:1,4; Ps. 89:1,7; Ps. 73:1,11**

Geliefdes in ons Here Jesus Christus, ons het hierdie feesnaweek dikwels gehoor van hierdie is

die laaste Afrikaanse kerk in die middestad van Pretoria. As dit nou ons benaming vir hierdie gemeente is, dan spreek dit demografies, dit spreek kultureel, dit spreek ook geografies.

Demografies het die werklikheid van die middestad drasties verander, baie sal wil sê die werklikhede het ons demografies ingehaal, kultureel word in die kerk Afrikaans gepraat, ja die laaste gemeente in die stad wat dit nog só doen. Watter voorreg om Afrikaans te praat en dit kultureel te mag voorhou en vashou. Die vraag is seker in baie se gemoed ... hoe lank nog?!

Geografies is baie se gevoelens as ons die besondere kerkgebou net op 'n ander plek kon neersit, dan sou ons dit graag wou doen. Tog is die gebou hier 'n staanplek gegee wat nie rondgeskuif kan word nie. Dis geografies hier vasgemessel met die bousteen van sand en klip en steen wat nie verskuifbaar is nie. Dis die drie werklikhede wat ons demografies, kultureel, geografies rondom hierdie kerkgebou op hierdie besondere dag nie van kan loskom nie.

Tog wil ek vandag vanuit hierdie werklikheid met die werklikhede in God se Woord by u as kerk, ja by u as feesvierende gemeente uitkom. Vir die Here se kerk in Filadelfia wil dit voorkom die Here spreek ook rondom drie werklikhede maar dit is asof die Drie-enige God dit 'n drie maal drie werklikheid wil maak, want in ons tekswoorde is die hoofsin die feit dat die Here hulle ken. *EK KEN JOU WERKE!* En dan sien ons drie dinge wat die Here sy kerk in Filadelfia mee ken, dit waarmee die Here die gemeente mee wou uitsonder. Ons lees aan die einde van ons

teks dié drie dinge wat in die gemeente nie misgekyk word nie. *Jy het min krag*, maar dan voeg die Here dáárby, *jy het my Woord bewaar* en dan voeg die Here nog weer daarby – *jy het my Naam nie verloën nie*. Ons praat van drie dinge, drie besondere waardevolle kenmerke waarmee die Here sy kerk in Filadelfia mee wou uitsonder, maar dan staan hierdie drie dinge in die verband van drie beelde wat die Here in hierdie kerk gebruik het, wat vir u as die laaste Afrikaanse kerk hier in die middestad ook besondere waarde moet hê.

Die drie beelde wat die Here gebruik is eerstens die beeld van 'n sleutel. Dan praat die Here ook van 'n deur. En daarby praat die Here van sy kerk in Filadelfia ook van 'n pilaar. Ons hoofgedagtes is dat al het die kerk min krag, die Here wil steeds sy sleutelmag hier uitoefen. Dit is ons eerste gedagte. Ons tweede gedagte is laat die bewaring van die Here se Woord nog altyd vir julle as gemeente die oop deur wees wat die Here vir sy kerk oopmaak. Ons laaste gedagte is die feit dat Filadelfia nie Christus se Naam verloën het nie, moet vir ons as kerk die pilaar wees waarop alles rus! Eerste dan -

Die kerk het min krag terwyl die Here steeds sy sleutelmag hier uitoefen:

Die kerk wat ons in Filadelfia van lees het min krag, al was die kerk deel van 'n stad met baie mooi betekenis. Die woord *Filadelfia* het juis uit die Grieks die mooi betekenis van *broederliefde*. As ons vandag in die deel van Asië kom waar hierdie kerk geleë was dan is daar 'n klein Turkse dorp wat hulle noem Alashir. Dis bergagtige wêreld, waar wingerde en die natuurskoon baie indrukwekkend is. Filadelfia en ook vandag Alishir was nooit 'n digbevolkte stad nie. Daar kom in die deel van die wêreld baie aardbewings voor wat gemaak het dat die stad nooit dig bevolk was nie. Soos bv. in 17vC was die plek deur 'n aardbewing heeltemal plat gegee. Voortdurend was die stad aan dieselfde gevaar onderworpe gewees. Dit het baie mense bang gemaak om nie daar te bly nie.

Al dra die stad die mooi betekenis van *broederliefde* was dit nie asof die kerk in hierdie besondere betekenis kon deel nie. Dit was op geen wyse 'n christelike stad nie. Trouens dit is die stad wat gemaak het dat dit lyk of die gemeente is eintlik maar sommer so 'n gemeente wat lyk of dit krepeer. Die gemeente was beslis nie in die oë van die stad 'n groot en indrukwekkende gemeente nie. Ons kan aanvaar daar is baie op hulle neergesien. Ja, die kerk is

vervolg en het swaar gekry vanweë die vervolging. Inderdaad het dit op die oog af gelyk hulle het maar min krag.

Die feit is, ook u as kerk vandag hier in die middestad van Pretoria mag in die wêreld se oë lyk soos 'n gemeente wat so klein geword het, baie sal wil vra, het hierdie kerk nog enige krag, het hierdie kerk in die wêreld se oë nie ook maar min krag nie. Vir Filadelfia wat genoem word die gemeente met die min krag is daar egter 'n doelwit wat nie deur mensekrag of indrukwekkende marmergeboue bereik word nie. Filadelfia, die stad het pragtige wit geboue gehad, van marmer gemaak, maar die kerk se krag lê nie in geboue nie. Ook in hierdie pragtige gebou, deur God se hand al 125 jaar bewaar, besef ons nog altyd en moet ons altyd onthou, lê nie in die mooi boustyl en pragtige argitektuur nie, maar in wat God daarvoor sê- EK KEN JOU WERKE ...

En dit waarmee God hulle in besonder uitken is die feit dat in die kerk 'n sleutel mag aan die werk was wat nie met mensekrag vergelyk kan word nie. Die Here sê in vers 7 - *Dit sê die Heilige, die Waaragtige, wat die sleutel van Dawid het, wat oopmaak en niemand sluit nie, en Hy sluit en niemand maak oop nie ...*

Hierdie kerk in Filadelfia kon Christus hoor sê ... *julle het die sleutel van Dawid*. Ons besef in daardie dae was sleutels nie so 'n alledaagse gebruik item soos vandag nie. Nie alle huise het sleutels gehad nie! Net konings en belangrike mense het sleutels gehad wat gewoonlik so 'n groot sleutel was. As iemand 'n sleuteldraer vir 'n koning moes wees dan was dit 'n baie belangrike en verantwoordelike werk. So iemand moes sorg dat daar net mense ingelaat mag word wat die koning werklik naby hom wou hê.

Nou besef ons die fisiese kerkgebou of saamkomplek in Filadelfia het heel waarskynlik geen gewone sleutel gehad nie, geen item waarmee deure oop-en toegesluit kon word nie, maar tog gaan dit in die kerk om 'n belangriker sleutel as om by 'n deur in te kom. Die sleutel wat die Here vir hierdie kerk van Hom gegee het, was om God se deur na Jesus Christus oop te sluit. Inderwaarheid gaan dit om by die poorte van die nuwe Jerusalem in te kom en daardie sleutel het die kerk alreeds! Die sleutel van Dawid wat ons in vers 7 van lees is die vervulling van die koningskap wat Dawid. In Jesaja 22:22 word daar alreeds van Dawid se sleutel mag geprofeteer

wat sy koningskap beskryf. In Jesaja weet ons was die sleutels aan Dawid se dienskneg, aan Eljakim gegee en dan sê God deur sy profeet Jesaja - *En Ek sal die sleutel van die huis van Dawid op sy skouer lê; en hy sal oopmaak, en niemand sal sluit nie; en hy sal sluit, en niemand sal oopmaak nie.* Christus is die finale vervulling van hierdie profesie wat nou 'n ewige Koning is - Christus is die Waaragtige, Hy is die Heilige wat *nou die sleutel van Dawid het, wat oopmaak en niemand sluit nie en Hy sluit en niemand maak oop nie.*

Al sê mense julle as Kerk het min krag, is die sleutel wat hier werk nie van ons krag afhanklik nie, maar Christus hanteer die sleutelmag. Watter troos om dit te mag weet! Al het die kerk min krag oefen God steeds sy sleutelmag deur Jesus Christus uit. Die mag en die gesag en die krag om dit te doen, is Christus aan die werk. Hy wat aan die regterhand van God is, Hy het dit reeds vir hierdie gemeente duidelik gemaak ek sluit vir julle die pad na God toe oop en niemand kan dit weer toesluit nie, al sal julle eie kragte heeltemal ingee.

Die troos wat dit vir ons as Kerk gee, ook in besonder vir hierdie gemeente in die middestad van Pretoria waar mense dalk mag vra, is daar 'n toekoms vir hierdie Kerk, dat ons mag antwoord, ons is dankbaar ons hoef nie oor ons eie toekoms te besluit nie. Die Here besluit daaroor, Hy wat die sleutel van Dawid het, Hy sal bepaal hoe lank ons nog hier in die middestad kan voortgaan. Soos baie mense vir hierdie ou klein kerkie in Filadelfia geen toekoms meer kon insien nie, geen lidmaat in Filadelfia was mense van aansien, ryk en belangrik nie, tog het die Here vir hulle die poort oopgesluit wat geen mens, hoe magtig, hoe invloedryk, hoe ryk enige mens ook mog wees, sou niemand kon oopsluit dit wat God reeds vir hulle in Filadelfia oopgesluit het nie. Die Here het sy sleutelmag in Filadelfia uitgeoefen soos wat God dit in hierdie kerk in hierdie middestad ook nog altyd sal bly doen, want het die Kerk in Filadelfia ook 'n tweede besondere beeldryke toevoeging ontvang. Vandag ons tweede gedagte -

**Mag die bewaring van die Here se Woord nog altyd vir julle as gemeente die oop deur wees
wat die Here vir sy kerk oopmaak:**

Die Here het van Filadelfia gesê- *Julle het min krag, maar julle het my Woord bewaar.* In vers 10 lees ons weer van hierdie besondere bewaring wat rondom God se Woord gesentreer staan: *10 Omdat jy die woord van my lydsaamheid bewaar het, sal Ek jou ook bewaar in die uur van beproewing wat oor die hele wêreld kom om die bewoners van die aarde op die proef te stel.*

Die bewaring van God se Woord is die wyse waarop God vir sy kerk deure oopmaak. Die Here het dit ook in vers 8 al gesê- Weereens God ken sy kerk se werke en daarom sê God vir hierdie kerk in Filadelfia, dit gaan nie net oor die sleutel wat kon oopsluit nie, maar die deur is reeds oopgesluit – ek het vir jou ’n geopende deur gegee en niemand kan dit sluit nie. Ook nie julle vyande nie. Hier praat die Here ook weer openlik van sy ware Kerk se vyande, wat ander mense as belangrik beskou maar dit is Jode wat nie God se Woord bewaar het nie. Trouens hulle gee voor hulle is die groot bewaarders van die Woord maar dit is mense *uit die sinagoge van Satan van die wat sê dat hulle Jode is en dit nie is nie, maar lieg Ek sal maak dat hulle kom en voor jou voete neerbuig en erken dat Ek jou liefgehad het.*

Dit is ’n tragiese ironie, want die naam Jood afgelei van Juda beteken letterlik om God te loof, maar die Jode in Filadelfia het juis die gelowiges in Christus vervolg. Hulle het die gemeente sy laaste krag wou ontnem, hulle wou deure vir die gemeente toemaak, maar hoe dankbaar kan die ware gelowige dit hoor, dit is juis ons bewaring van God se Woord wat deure vir ons oopmaak. Hulle kom kamtig vanaf die sinagoge, waar hulle sê hulle God wil dien, maar Christus noem hulle sinagoge van die Satan. ’n Harder beskrywing kon die Jode seker nie hoor nie, maar Christus noem hulle inderwaarheid die vernietigers van sy Woord, alles behalwe mense wat sy Woord bewaar het.

Die ware Jode in Christus se oë, die werklike bewaarders van sy Woord is daardie klompie gelowiges in die kerk in Filadelfia. Nie talryk nie, nie magtig nie, hulle beïndruk geen mens nie, maar tog was hulle standvastig en getrou. Daar was liefde, daar was toewyding. Dit is die eienskappe wat kan maak dat ek God se Woord bewaar. Eienskappe wat daartoe lei dat God vir sy Kerk deure oopmaak. Juis as gevolg van hierdie gemeente se swaarkry en lyding, ja hoe andere op hulle neergesien het, het Jesus vir hulle deure oopgemaak. Jesus sê dan ook vir hulle – *Omdat julle geduldig is en in die swaarkry volhard het, gee Ek vir julle ’n geopende deur.*

Dit moet u as Kerk hier in Pretoria ook altyd onthou, hoe lank u ook nog hier kerk mag wees. As God deure toemaak dan maak Hy wat God is ook weer nuwe deure oop. Toe deure in jou en my lewe kan baie dinge beteken. Dinge wat jou seermaak, dit wat die lewe vir jou swaar maak,

maar wees as kerk geduldig. Jesus leer ons wanneer ons in ons swaarkry geduldig is en ons bly op Hom vertrou, dan sal Hy ook weer vir ons nuwe deure oopmaak. God gebruik eintlik toe deure om daarmee nuwe deure oop te maak. Tog is die enigste wat by die nuwe deur mag geld dat ek steeds God se Woord sal bewaar.

Hierdie bewarende Woord wat my bewaar daarom moet ek ook die Woord bewaar, dis die Woord wat my help om my mislukkings reg te hanteer. In die Grieks is daar 'n uitdrukking wat in die Grieks so mooi klink ... *pathemata mathemata* ... Al wat hierdie uitdrukking sê is dat swaarkry is lesse. Lesse wat daardie mense uit die sinagoge nie wou leer nie. Daarom het hulle eintlik meer 'n sinagoge van Satan geword en was hulle lankal nie meer sinagoge van die ware God nie. Hierdie ou klein kerke is nou vir God die ware kerk, die eintlik sinagoge, die eintlik Jode is hulle wat uit die swaar van die lewe bereid is om ook lesse te leer. Hulle was tot die *pathemata mathemata* in staat. Hulle bewaar God se Woord ook in die swaar lesse wat hulle al in die lewe moes leer. Die lewe is swaar, dit vertel bladsy na bladsy in die kerkgeskiedenis ons ook. Daarom as hierdie gebou, hierdie 125 jarige gebou kon praat, dan sou hieruit ook al van baie swaarkry gepraat kon word.

Maar die swaar van 'n gebou bring ons ook by ons laaste gedagte vandag. Wanneer 'n gedeelte van 'n gebou te swaar raak, dat alleen die fondasie nie meer die gebou kan dra nie, weet u dan bou die mense pilare onder dit wat te swaar raak. Dis presies die derde beeld wat by Filadelfia ook gebruik was. Daar word van 'n sleutel gepraat, daar word van 'n deur gepraat, maar daar word ook na 'n pilaar verwys -vers 12- *Wie oorwin, Ek sal hom 'n pilaar in die tempel van my God maak ...* Ons laaste gedagte is dan ook -

Om Christus se Naam nie te verloën nie, moet vir ons die pilaar wees waarop alles rus!

Ons het vroeër daarna verwys hoe Filadelfia in 17vC heeltmal deur 'n aardbewing platgevee was, en in die jaar 95nC toe Openbaring geskryf was, toe was daar weer 'n aardbewing. Terwyl Johannes nog gelewe het en hy as ouman hierdie openbaring ontvang het en aan die skrywe was, was hulle besig om die stad weer te herbou. Ons kan ons voorstel soos mense besig was om te herbou het hulle aanmekaar gesê ons moet onder ons geboue nog meer pilare insit om die geboue sterker te maak.

Tog is dié werklike pilaar waarop alles vir die kerk van die Here op moet rus eintlik net één so 'n groot pilaar nl. om die Naam van Christus nie te verloën nie. Dit wat die Here reeds aan die gemeente toegesê het- julle het min krag, maar julle het my Woord bewaar en my Naam nie verloën nie.

Mag dit ook die pilaar vir hierdie gemeente wees waarop alles mag bly rus. 'n Pilaar is hier simbool daarvan wat vas is, dit skuif nie, dit kan 'n groot las dra, dit hou die gebou regop. Alles van toepassing op iemand wat Christus se Naam nie verloën nie. Mag Christus se Naam nooit hier verloën word nie! Dis so 'n groot troos as Jesus dit duidelik maak: *Wie oorwin, Ek sal hom 'n pilaar in die tempel van my God maak, en hy sal daar nooit weer uitgaan nie; en Ek sal op hom die Naam van my God skrywe en die naam van die stad van my God, van die nuwe Jerusalem, wat uit die hemel van my God neerdaal, en my nuwe Naam.*

Die Heilige, die Waaragtige, ja Hy wat Jesus Christus is, sê vir hierdie Kerk van Hom- dat u as lidmate in hierdie kerk, ja elke gelowige wat deur Jesus Christus oorwin reeds 'n standvastige pilaar by God is. Al word jou lewe ook rond geskud soos wat Filadelfia deur baie aardbewings al rond geskud was, maar die mens wat in Christus is en hy/sy Christus se Naam nie verloën nie, is 'n pilaar wat staande sal bly al is die aardbewings ook hoe erg!

Jesus wat sy kinders sy pilare maak is die mense wat groot druk enduit kan hanteer. Hulle dra die druk tot eer van die Here. Dan sê Jesus ook aan die gemeente dat Hy die Naam van God op hulle gaan skrywe. Dis asof ons Jesus dit met trots kan hoor sê dat saam met die Naam van God sal Hy ook die Naam van die stad op hulle skrywe. Hulle kan in die stad se poorte reeds gaan staan, want hulle het reeds die sleutel, hulle het reeds die deur wat vir hulle oopgemaak is, ja so bou dit op, hulle kan reeds wees die pilare waarop God se Naam en God se stad reeds opgeskrywe is. Die stad wat sal wees die nuwe Jerusalem, ja net 2X word die nuwe Jerusalem in Openbaring pertinent genoem en as die gemeente so direk met die nuwe verbind word, watter eer moes dit nie wees vir die kerk in Filadelfia nie. Die nuwe stad, die nuwe Naam word hulle reeds toegesê. Watter eer as dit met 'n Kerk gebeur. Dit wat ook hierdie kerk toegesê mag word, 'n kerk waar sy huidige gebou alreeds vir 125 jaar ook op besondere pilare rus, 125 jarige oue

pilare, maar mag die eintlik pilaar hier ook altyd wees om die Naam van Christus nie te verloën nie.

Mag daar altyd die volle waarheid van Filadelfia ook u waarheid wees. U het reeds die sleutelmag ontvang, daar is steeds 'n geopende deur ook vir hierdie kerk in die middestad, ja u nuwe naam geskryf op die pilare van die Godstad saam met die naam van die nuwe Jerusalem. Daarom al mag dit voorkom ons het min krag, bewaar die Here se Woord en mag niemand die Naam van Jesus verloën nie.

AMEN